

IERENUI-OHAUA PORAKA.

Piira Nama 14.—A Te Waaka Paraone te Ranui me etahi atu. I unuhia tenei piira e te kai-piira i te 8 o nga ra o Hanuere, 1907.

Piira Nama 15.—A Te Iwikino Hairuha me etahi atu. I unuhia tenei piira e te kai-piira i te 5 o nga ra o Pepuere, 1907.

No reira e tohutohu atu ana matou ko enei Piira Nama 14 me Nama 15 me whakakore atu.

Piira Nama 12 me 13.—A Numia Kereru me etahi atu, e tono ana kia wehea ki waho o Ierenui-Ohaua Poraka tetahi piiri whenua e kiia ana he wahi no Maungapohatu Poraka i whakaurua hetia ki roto ki Ierenui-Ohaua Poraka. Kaore he kai-whakahe i tenei kereme; no reira ki ta matou whakaaro me whakamana tenei piira, a ko taua wahi e keremetia nei e Numia Kereru me tapahi ki waho o Ierenui-Ohaua Poraka me apiti atu hei wahi mo Maungapohatu Poraka; a ko nga rohe o taua piiri me whai haere i runga i nga raina kua haea ki te pene rakau i runga i te Mapi Nama 6852A, timata atu i te whika 1 mutu atu i te whika 3.

Piira Nama 16.—A Te Pouwhare te Roau me etahi atu, e whakahe ana mo etahi tangata 88 i roto i te ota. He nui nga korero i puta ki o matou aroaro mo tenei keehi; a kua kite iho matou i puta ano ena kupu whakahe i te wa ano o te Komihana tuatahi, i te mea e rua nga taha e tautohe ana i taua wa e whakahe ana tetahi taha ki nga rarangi ingoa a tetahi, a e pera ana ano hoki tetahi taha; a kaore kau hoki he take hou i whakaaturia mai i te wa o tenei whakawakanga i o matou nei aroaro. No reira ki ta matou whakaaro me mau tonu ano ki aua tangata e whakahengia nei nga hea i whakataua kia ratou e te Komihana tuatahi; a me tenei piira me whakakore atu.

Piira Nama 11.—A Tamehana te Puia me etahi atu; e tono ana kia whakaurua atu o ratou ingoa tangata hou e rima tekau ma tahi ki te ota. He nui nga korero i whakaaria hei tautoko i tenei keehi. Otira ki ta matou titiro kaore he korero kaha mo nga noho tuturu ki te whenua e tika ai kia whakauruhia atu o ratou ingoa ki roto ki te ota. No reira e tohutohu penei atu ana matou me whakakore atu tenei piira, a ko te rarangi ingoa tangata me nga hea e mau na i roto i te ota tuatahi me whakapumau. Otira ko te whakataua a te Komihana tuatahi me whakatikatika i runga i te tapahanga atu o taua wahi o tenei Poraka kua kiia i runga ake nei kia wahia ki waho hei apititanga atu ki Maungapohatu Poraka, me nga rohe me nga eka o tenei poraka me whakatikatika i runga i tera ahua.

Ko nga tangata e whitu e mau ake nei o ratou ingoa i raro he tangata i kowhiria e nga tangata nona te whenua i roto i a ratou hei mema mo te Komiti Hapu mo tenei poraka, a i whakaaetia ano hoki e nga tangata katoa o taua whenua i tae mai ki te aroaro o tenei Komihana i te nohoanga ki Whakatane i te 8 o nga ra o Maehe, 1907.

1. Numia te Ruakariata.
2. Te Pouwhare te Roau.
3. Te Whetu te Paerata.
4. Te Wharekiri Paparatu.

5. Mika te Tawhao.
6. Akuhata te Kaha.
7. Hohia te Ahikaiaata.

GILBERT MAIR (Tawa).
D. F. G. BARCLAY (Pakere).
PARATENE NGATA.

KOHURU-TUKUROA PORAKA.

Piira Nama 19.—A Te Rahui Hoera me etahi atu. Ko tenei piira i unuhia e Mihaka Matika i runga i te tono a te kai-piira i te 5 o nga ra o Pepuere, 1907.

Piira Nama 20.—A Tamehana te Puia me etahi atu. Ko tenei piira i unuhia e te kai-piira i te 1 o nga ra o Maehe, 1907.

No reira e tohutohu penei atu ana matou, ko enei piira e rua, Nama 19 me Nama 20, me whakakore atu.

Piira Nama 17 me Nama 18.—A Numia Kereru me Te Wharepouri te Amo. Ko te rua o enei piira, te Nama 18, e whakahe ana mo etahi tangata i roto i te ota; a he nui nga korero i homai. I raro i te Piira Nama 17, a Numia Kereru, i tonoa kia wahia te poraka i runga i te raina ruri e mau nei i te mapi o taua whenua Nama 6849A, ara timata atu i Te Taimatua tae atu ki Te Raepohatu; a ko Numia e kereme ana i te wahi o te poraka kei te taha tuaraki o taua raina e takoto ana, hui atu hoki ki te wahi e ki nei ia i whakaurua hetia atu ki roto o te rohe o Tarapounamu Poraka.

Kua ata whiriwhiri matou mo enei piira e rua, a e tohutohu atu ana i runga i te taunga iho o a matou whiriwhiri, penei:—

(1.) Ko nga ingoa tangata e whakahengia ana i naianei, na te taha ake ano kia Numia ma i whakauru i te wa o te Komihana tuatahi hei tangata tika no ratou ake nei o ratou take; no reira ko tenei piira me whakakore atu (ara te Piira Nama 18.).

(2.) Mo te tono kia wehea te poraka; ki ta matou titiro ka pau he taima roa i te ata rapu marire i nga tangata tika e whai paanga ana ki tetahi taha me tetahi taha o te poraka mehemea ka wahia peratia, a ki ta matou whakaaro he mahi tera e tika ana kia waihotia atu ma tetahi Kooti Wehewehe a muri atu nei e wahi taua whenua mehemea ia ka tonoa kia peratia. No reira me whakakore atu tera wahi o tenei piira.

(3.) Mo te wahi o tenei poraka e kiia mai nei kua whakaurua hetia ki roto o Tarapounamu Poraka e te Komihana tuatahi: kaore kau he piira a Numia i whakatakoto ai mo Tarapounamu Poraka, engari i tuku piira ia mo Kohuru-Tukuroa Poraka anake; a e ki ana ia i mahara ia ka ahei noa atu i raro i tera piira aana kia whakahaeretia he uiuinga mo taua wahi o tenei poraka e ki nei ia i riro ki roto o te rohe o Tarapounamu Poraka.

I korerotia mai ki o matou aroaro tetahi urupa me nga tupapaku kei roto, me etahi kainga, no Numia Kereru me Ngati Rongo, e kiia ana kua whakaurua hetia atu ki roto o Tarapounamu Poraka, mehemea ra he tika; otira i te mea kaore kau a ratou piira, no reira kaore he kupu ma matou mo runga i tenei take.